

Due vecchi innamorati d'una figlia.

CANZONE XVII.

A j'è naje una gabela
 Tra Simon e tra Bastian,
 A saria pro ancor bela
 S' a vneisso ampò a le man.
 A saria pro ancor bela
 S' a vneisso ampò a le man.
 Tni da ment s' i digh busia,
 Ai va esse un brut armor,
 Prchè a ven da gelosia
 Ch' a son piasse tra d' lor.
 Prchè a ven, ecc.

Sti bavos e langrignaire
 Tuti doi son carpionà
 D' una fia d' un brustiaire,
 Ch' a sta là ant soa cantonà.
 D' una fia, ecc.

Un l'è vei com' una pera,
 L' autr l'è vei com' un serpent,
 Un a l'è con la denera,
 L' autr l'è ciorgn e senza dent.
 Un a l'è ecc.

Costa fia l' ha male penna
 Trant e set o trant' eut agn,
 Bianca e rossa com' la chenna,
 Desgagià pa pi ch' 'n scagn.
 Bianca e rossa, ecc.

Venta vede che caresse
 Van fasendie coui griseui,
 Son tant pià da coule blesse,
 Ch' a van tut an breu d' faseui.
 Son tant pià, ecc.

- Un l'ha faje fè la dmanda
 Da Cristofò Garnacias,
 L'autr l'ha mandaie da soa banda
 Gian Antoni Mostafas.
 L'autr l'ha mandaie, ecc.
- Son andait con tanta tola,
 Che 'l brustiaire l'è sta moch,
 Son stait ampò prima d' di parola
 Ancantà com' doi oloch.
 Son stait ampò, ecc.
- Ma 'l brustiaire an cortesia
 L'ha mandaie fè ampiumè,
 An disend che d' una fia
 Pi d' un gener s' peul nen fè.
 An disend, ecc.
- Maginè sti vei balota
 Com' a son restà brovà,
 A l'è sta una bruta bota
 Pr squarseje la corà.
 A l'è sta, ecc.
- Quand a l'an savù ch' a l'ero
 Tuti doi an pretension,
 Pofarbaco ch' a sautero
 Anfiamà com' doi lion!
 Pofarbaco, ecc.
- Pr decide la conteisa
 Son mandasse a desfidè,
 Toni Bioch l'ha pià l'impreisa
 D' andè chial pr messagè.
 Toni Bioch, ecc.
- Tra mantrè s' son armasse
 Da fè por a gat e can,
 Con i manni dle ramasse,
 E una crossa a pr un an man.
 Con i manni, ecc.

L'andoman sti gnoch son levasse
 Tuti doi d' bon matin,
 L'è capità ch'a son incontrasse
 Sot la fnestra d' so giojin.

L'è capità, ecc.

Pensè un poch com' a son fasse
 Dii brut eui quand a s' son vist,
 Basta di ch'a son bucasse
 Con la rabia d' l' Anticrist.

Basta di, ecc.

Maraman a l'an comensà
 Vilaniesse com' d' cagnas,
 L'un pr l'autr n'an destacà,
 Ch'a sentije l'era un spas.

L'un pr l'autr, ecc.

Un disia a l'avversari:
 E cos' astu pr pensè,
 Bruta cera da urinari,
 A voleite ambarassè?

Bruta cera, ecc.

Rascasson con la denera,
 Dur d' oria com' un doi,
 Carn da pich, bandi d' galera,
 Carià d' roгна, d' lendne e d' poi.

Carn da pich, ecc.

T' as avu tant' arogansa
 Pr mandeme a desfidè,
 T' veui mostrete la creansa,
 E voltete 'l dnans darè.

T' veui mostrete, ecc.

I t' fareu passè 'l sproviso,
 E la volontà d' fé 'l gros;
 Con un sofi mi t' sbriso,
 E t' fracasso tuti j' os.

Con un sofi, ecc.

L' autr vei l' ha drissà j' orie
 A scotè sti compliment,
 Peui apres l'è sta da rie
 Com' a j' ha viraje i dent.
 Peui apres, ecc.

A j' ha dije: testa d' aso,
 Cosa fastu tant fracas?
 S' i t' pio, mi si ch' t' craso
 Le servele, gambe e bras.
 S' i t' pio, ecc.

I son si con bonna veuja
 D' abassete coul cacat,
 Scardassà, fieul d' una treuja,
 Carn da diavo e da piolat.
 Scardassà, ecc.

Che vision d' mariete?
 Rassa d' boja, mort d' fam,
 Speta ades, i t' veui levete
 Coul gatij, galup infam.
 Speta ades, ecc.

Desdentà, mostas da bronsa,
 Cosa veustu rasonè?
 I t' peise gnanch un' onsa,
 Pover gnero mort an pè.
 I t' peise, ecc.

Su loli son atacasse
 Pr coui des o dodes brin,
 Tuti doi son arvoitasse
 Ch' a smiavo giust doi crin.
 Tuti doi, ecc.

So giojin a s' è desviasse
 An sentiend tut coust armor,
 Dunna dunna s' è levasse
 Pr sciairè ampò i seu sfojor.
 Dunna dunna, ecc.

S'è butasse dlong a rie
 Ch' a savia la rason,
 Ch' a fasio ste folie,
 E conteise da tomon.
 Ch' a fasio, ecc.

A l'è subit staita lesta
 A piè 'l vas da sot al let,
 L'ha largailo su la testa
 Spas e rair tut bin confet.
 L'ha largailo, ecc.

Cousti gonzo son sentisse
 Così bin ambalsemà,
 Si ch' d' si ch' a son spartisse
 Senza gnanca pi fè fià.
 Si ch' d' si, ecc.

Delle qualità delle Donne.

CANZONE XVIII.

Chi sta amis con le fumele
 N'avrà mai so cheur content,
 A son tute tante vele
 Ch' a van secondand ij vent.
 Seve nen ch' a son d' volpasse,
 E d' serpent stermà ant ij fior?
 I stari sempre ant le strasse
 An fertandve ansem a lor.
 Gioventù, chitè le scufie,
 D' autrement a v' costrà car,
 Seve nen ch' a son d' bernufie
 Incostante pi ch' 'l mar?